

四庫全書

集部

欽定四庫全書

史部

甘肅通志卷四十八至

詳校官監察御史<sub>臣</sub>李陽棧

檢討<sub>臣</sub>德生覆勘

總校官檢討<sub>臣</sub>何思鈞

校對官中書<sub>臣</sub>葉葵

騰錄監生<sub>臣</sub>李鳳丹

欽定四庫全書

甘肅通志卷三十八

孝義

三物六行膠庠訓士首重於孝純孝敦倫鄉閭矜式  
可以風勵世俗至於慷慨仗義崇尚廉隅敦重然諾  
捐貲卹患道不拾遺甘雖邊徼民風淳厚亦時見焉  
志孝義

臨洮府

魏辛 穆字叔宗狄道人舉茂才為雍州別駕初隨父  
鳳達在下邳與彭城陳敬文友善敬文弟敬武少從  
師遠遊久不歸敬文病臨卒以襍綾二十疋託穆與  
敬武穆久不得見經二十年於洛陽見敬武以綾還  
之封題如故歷義陽太守領戍雅有恤人之志再轉  
汝陽太守遇水滂人飢上表請輕租賦帝從之勅汝  
陽一郡聽以小絹為調除平原相徵為征羌將軍大  
中大夫卒於郡贈後將軍



辛少雍字季和狄道人少聰穎有孝行尤為祖父紹  
先所愛嘗呼共食羊肝及紹先卒少雍終身不食羊  
肝性仁厚有禮義門內之法為時所重始為田曹參  
軍清正不憚強禦請托路絕時稱賢明正始中詔百  
官各舉所知高陽王雍及郎中李憲俱以少雍為舉  
首卒於給事中少雍妻王氏有德義少雍與從子懷  
仁兄弟同居懷仁事之甚謹閨門禮讓人無比焉士  
大夫以此稱之

明岳 宗狄道人由舉人任江油縣知縣清苦慈明民  
愛而畏之去後立碑頌德歸里後為學宮置祭器二  
百餘舉官中俸貲及祖遺產業令子與姪均分之

趙 柰臨洮人會川伯安之孫府學生事親至孝父  
有疾晝夜祈禱於天父歿哀毀而卒

曹邦彥臨洮人知縣俊之孫府學廩生善事父母父  
染疾籲天祈以身代父歿數日不食哀毀而卒遠邇  
以孝子稱之

雍 蘭狄道人郡諸生母患瘡蘭啞之母卒廬墓三年

楊 豸狄道人父桂戍貴州豸隨戍所竭力奉養桂歿豸扶櫬歸里母病篤豸侍湯藥衣不解帶母卒號泣幾絕舉二親合葬

段鳴鶴蘭州人性至孝父疾籲天求以身代刲臂肉燔為灰和湯藥以進疾尋愈鄉人以孝重之孫堅南陽知府

石 恒蘭州貢生任直隸正定府經歷正統間父喪  
廬墓母失明恒顙天顴而愈人共稱焉

唐 泉字本清蘭州人天性孝友母蕭氏病篤嘗割  
股和藥飲之而愈與弟海友愛最篤後海卒每食必  
號哭不一載得疾亦卒嘗赴京同衛汪姓者沒於京  
負其骨歸葬之

陳 泰蘭州人與弟和極相友愛和卒遺二子曰簡  
曰策俱幼泰養育周至不啻已出

陳和泰之弟天順間泰被選從征和念泰年邁且乏嗣遂請於總戎願代泰往既中流矢官司給輿以歸病十餘年鍼始潰出及卒毫無怨悔鄉士大夫咸稱之

周海字克容蘭州千戶嘗師事段堅篤學好禮以古人自期居官公勤清慎戎務畢舉事親純孝母嘗病籲天求以身代妻張氏割股和藥以進母疾遂愈殷富蘭州人純篤孝友舉成化丁酉鄉試任樂平

縣訓導陞昌平州學正弟曰實曰安曰寧富皆勉以舉業後先俱登鄉薦後寧卒遺孤養育周至不啻已出士林重之

殷 實蘭州人舉成化庚子鄉試學行端毅居父喪三年不入私室丁母憂枕塊寢苦中寒疾而卒

王 麟字廷瑞蘭州人事繼母以孝聞成化間父用以訟繫獄遭疾幾危麟禱於天願以身代尋疾愈謫戍廣西麟代父行踰二年中瘴癘卒於戍所僕負骨

歸葬於蘭士林皆稱為瘴江孤孝

蕭憲字孟章蘭州人端淑純謹性至孝舉成化十三年鄉試以親老不赴會試後授中牟知縣未任而卒鄉人惜之

李銳字徐之蘭州人監生任四川簡州訓導性敦實好學甘貧不苟取事繼母盡孝撫育諸弟及弟之孤甚厚性行純篤有前輩風卒於官

禹祥字廷珍臨洮衛人舉成化十三年鄉試任劍

州知州生平廉能性至孝家嘗被火祥惟抱先人主  
餘悉不顧

彭 錠蘭州人父早卒事母盡孝嘗客於外有友卒  
於邸錠買骨還葬不求人知以子澤貴誥贈柱國光  
祿大夫

張 儒字為已蘭州人弘治乙卯舉人勤苦有志行  
事父母克孝事伯亦如父伯無子卒即奉養伯母於  
家事如母授新繁知縣未任



蔣 漢蘭州人天性孝敬家雖貧凡力所能者無不奉親邁時新品物親未嘗不忍入口每出飲必先置父母所用酒肉而後往人稱孝養

段 增字志崇蘭州人性耿介刻苦問學親歿三年不赴飲燕處家一絲粟不入私室其從妹孀居一子一女增撫愛如子鄉人賢之子續登進士仕御史

李 敦渭源人父早喪母撫育成立敦孝敬異常及母歿遂廬墓側朝夕拜哭萬歷二十八年直指表其

門

羅應誥狄道人府學生事父孝菽水必親捧起居必親扶壽八十有五卒應誥哀毀骨立既葬廬墓三年哀慕如一日

劉雄蘭州人少失恃力農為養事繼母韓稱孝韓性嚴急屢被譴責愈加敬謹韓因化為慈母迄長父命與兄異爨力辭不忍乃以田園讓兄而自取敝廬至於葬舅喪焚負券鄉人最重之

陳鑑蘭州人以孝聞里閭母歿哀毀踰禮不入私室者三年事師孟生極厚孟將終托孤寄金帛於鑑其後孤成立悉還所寄封識宛然鄉人咸服其義王純字原誠河州人竝仲子事父母寒暑不怠以父廕國學生修業未竟聞母疾不踰月鬚髮盡白疏乞歸養詔允之例授狄道縣丞侍疾顛天請以身代比卒悲痛三日不食哀毀踰禮旌表

楊均蘭州人立心制行邁出等倫父及伯父早卒

均孝事伯母及母撫姊遺孤營舅氏喪篤於恩義人所難及

任重蘭州人弘治初庠生母卒廬墓三年有盜犯廬所欲刳衣糧重守墓號泣盜感其孝遂去

王朝相狄道庠生從遊楊繼盛之門清操不苟一日市有遺金呼遺金者還之繼盛贈其門曰十兩白金輕一芥百年清操重千鈞後三世孫王汝明登第楊啟蒙狄道人萬歷中為郡推官吏時學政嚴有五

康生得罪推官欲揭以行劣命蒙錄過蒙請曰五生  
半世寒帷休之一旦小人弗忍請之至再推官怒咎  
之蒙叩頭流血堅辭而出曰吾不忍以刀筆殺子孫  
次早推官呼蒙至曰予因汝言五生劣狀俱焚之矣  
嘗聞有陰德者必大其門閭爾子孫必有登第者其  
子行恕果登天啟二年進士官翰林院庶吉士

曹守忠蘭州人性慷慨萬厯初兩遇奇荒煮粥救饑  
全活甚衆又出其積粟平價出糶流離者資助還鄉

貧病者施藥療治當道以義民旌之

李守文蘭州人幼有至性母李氏甫二十餘孀居多疾文晝夜侍湯藥及長夜必數起視寒溫家雖貧竭力以供甘旨母壽八十奉母五十餘年畧無懈志內外以孝子稱之

駱興周蘭州人幼年喪父母郭氏孀居四十餘年竭奉甘旨曲體慈心微聞母愁戚聲伏榻婉慰竟夜不寐撫姊妹四人情義切篤肅藩旌曰母慈子孝

趙重琮臨洮人指揮使掌衛事十餘年先是屯政多以常例病民琮力革舊習萬厯中捐粟千餘石賑饑存活甚衆尤通經史雅意文學每以屯政所贏厚賓興禮士林重之屢有戰功受上賞官至鎮國將軍廖恕狄道人性至孝家貧葬母負土築墳構茅茨以廬墓者三年

張行敏字公孺狄道人舉天啟辛酉鄉試淹貫六經諸子刻陰隲文以自佩嚴冬捐貲煮粥人皆德之仕

觀城知縣甫三月會李逆之變挂冠歸里天性孝友言動有法郡子弟皆矜式焉

張漢俊字令房臨洮衛人舉天啟丁卯鄉試三歲喪父其母與大母俱孀姑婦相守紡織撫孤稍長日夜悲思其父孝事母若成人肆力經史以理學自期言不妄發人不妄交人皆重之與兄漢傑同居友愛諸戚貧者代為婚嫁賑窮周乏恤孤養老望重一時以疾卒於家



張旺狄道人生平積行累仁嘗一日平旦入城拾旅人金三百五十錢密藏僧舍候至午見二人號泣詢之二人備道遺金情事旺盡還之毫不受謝後孫萬紀登進士

袁應舉臨洮人幼讀孝經小學心佩之事親色養父母亡合葬之廬墓三年朝夕悲號不入家門日手作三坯及三年成大塚後生孫玠博碩宏通為時大儒所著有臥雪集六卷傳於世

李一桂臨洮人郡庠生性純孝天啟中父柱材授靖  
邊學正陞四川渠縣令未赴任卒桂奔喪扶櫬中途  
被刦資斧一空時值隆冬雨雪桂鬻身衣覓人同已  
輿櫬及衣盡乃抱柩號泣仆地適上官經過捐給路  
費始得扶柩歸葬

皇清喬漢儒渭源人庠生家貧父早亡母侯氏儒躬畊侍  
養誠敬不衰及沒後膝行搬土成墳廬墓三載

吳成德河州人初喪父哀毀骨立葬之日即廬墓以

母故朝侍母夜廬墓周年始歸母沒既葬廬墓三年酒肉未嘗入口人歎以為難

朱祚長字敬符金縣人三歲喪父祖父母撫之勤學勵志祖國弼任河南河內縣丞卒於任聞訃哭死復甦事祖母純孝會土寇破城欲殺其祖母長挺身願代賊感其誠兩釋之

張經綸狄道人素精醫術與郡人許虎臣為莫逆交未幾臣夫婦俱亡遺孤幼家且貧綸禮葬臣憐其孤

卷三十八  
日余與臣善若子即余子也納諸家撫育如已出比  
長就外傳尋以女妻之傳以醫術與已子平分其產  
郡人皆高其義

劉煥然字文甫金縣人庠生為人清潔寡欲貧淡自  
甘順治七年拾銀百兩俄而縣役李通本呼號尋覓  
不獲蓋遺失領解餉銀也煥然還之

### 鞏昌府

宋程俊會州人紹興初居栗亭之泥陽鎮俊幼時父

母陷於夏常號泣自毀逮長捐家財數十萬以贖未  
至日北向號泣寢食俱廢夏人感動還其母邵氏俛  
日夕承順奉養周至又事族兄恭謹撫諸弟友愛贍  
母黨百餘口服食器用必與已同鄉里稱至孝

元劉文德安定人父病三閱月朝夕侍湯藥恭敬弗懈  
父卒葬廬墓三年五辛不入口時有白兔異草之瑞  
有司舉為孝廉授鞏昌衛經歷

明曹敬德親沒廬墓三年

康堯寧遠人宣德年民飢堯輸粟千石有司以聞  
勅賜冠帶至今號萬石康家

成勲隴西生員親沒廬墓三年

張世昌隴西人父母沒前後廬墓六年

關世安隴西生員父玘年八十餘卒世安哀毀幾絕  
既葬廬於墓側日績毛線自給偶值兵變鄉民驚逃  
世安墓居自若致白鼠群鳥之異

張世恩安定人父母謫戍海南客死數萬里外世恩

朝夕號泣幾至殞絕乃盡鬻產業竟航海扶櫬而歸  
張宗讓鞏昌衛人幼孝得一味不奉親不入口及長  
闔家遘疫父母兄弟皆死號泣屍側治喪而疫不染  
有子七人亦能孝

邢自明鞏昌衛人母卒負土築墳廬於墓側三年晝  
夜號泣形銷骨立

石友瑤安定人輕財重義每歲荒粥以賑飢棺以葬  
亡邑人頌之成化間大飢瑤輸粟千石及豐都御史

馬文升令民償粟琮不肯受文升義之表授正七品冠帶孫璜大名府教授素有孝行邑令榜其閭曰世孝義之門

徐徹隴西人平遙縣令諸生時事親色養備至不求人知嘉靖甲子將赴省試宿於逆旅主者曰君非隴西徐徹乎對曰然主者曰吾早起聞空中人語隴西徐徹以孝中今科四十二名榜發果如其言

魏文曇寧遠人成化間隴右饑文曇輸粟二千石有



司聞於上勅賜七品冠帶

漆 金伏羌人天性至孝母張氏病卒金哀毀踰禮  
既葬廬墓三年號泣如一日有玉兔白狼遶眠塚上  
天雨雹惟墓所週圍十里不害其稼人以為孝感所  
致弘治五年旌表

吳 瑛靖遠衛指揮少孤母馬氏撫育成立及嗣職  
事母孝厯官都督俸資胥歸於母惟母分給諸弟共  
食一堂一日母疾醫曰人肉可療瑛遂割肉投粥母

即愈官至總兵

高文靖遠庠生父俊歿於陣家寒諸弟冲幼竭力事母友愛諸弟嘉靖七年赴中衛糴糧忽心惕即馳歸果母病弟武亦往河南經歲適至三日母卒鄉人皆稱至孝所感

張總靖遠人篤於好善明末大荒飢民死者不可勝計總獨捐貲雇夫掘大坑各處收埋屍骸三千有餘衛人義之

劉世經岷州舉人任直隸深澤令好古博學力行孝  
弟既葬親廬墓三年

皇清楊純臣字東丹漳縣人性至孝五十八歲舉會試第  
五事母備極色養侍側不忍遠離母亡哀痛時年已  
六十二歲每出入必拜母主既葬始筮仕青城令清  
累年賠苦蠲無藝之征釋舊令之羈輸貲米立義倉  
善政種種告老歸青人扳轅號泣觀者歎息年八十  
一正襟危坐而逝

周祚寧遠人歲貢生明末甲申之變邑諸生溫元春等倡義不成死於是賊謂寧遠皆頑民將屠之衆詢懼計無所出祚曰舉事不成死自其分貽禍桑梓使一邑無噍類可乎吾固不惜七尺軀以請一邑之命獨往賊營見偽侯袁某百端開譬始免一邑於難邑人頌之

周之正寧遠人庠生家貧力學以行誼孚鄉里旦日出行官道見遺囊拾之至家視之中皆白金及銀器

私念此必官府遺物即持物尾至縣果某官差役所遺已妄訴無辜刑訊不服正即出其囊曰此非遺物耶令大喜詰其人叩頭服罪實不知遺所妄意衆人以自解耳令于是具始末及正素行請於上官表其閭且置義田若干畝以旌之

吳元孝靖遠人家貧一日偶見道有小包拆視之乃黃金一兩九錢候至晚不見有覓者次日潛至南街布店見失金者與店客相爭元孝詢其故果所拾物

卷三十八  
聲數付還衆論稱之

平涼府

明馬 襄靜寧州人永樂八年入貢任魏縣丞性至孝  
凜遵庭訓每事必告值父疾躬侍湯藥夜不安寢父  
疾尋愈與母皆八十餘終裏哀毀骨立幾不欲生廬  
墓三年猶孺子號德孚於人久而無間人皆稱道不  
置云

桑 桂平涼人成化間舉人授大名府通判廉靜好

古重風教酌定禮儀鄉人踵行初母宋氏疾篤顛天  
割股疾愈後在京師父卒於家終身悲號追思想像  
以祀之人咸稱其孝

趙玉平涼人正德二年省親平谷途拾旅金二百  
兩還之以貢任元城霑化學博實心課士循循善誘  
登科甲者十餘人子時春貴贈翰林院編修

侯政平涼人監生母疾危晝夜禱天祈以身代割  
股和藥以進母疾愈後任濟陽知縣聞母喪悲號不

食而卒

常經鎮原縣庠生以孝稱於鄉親有疾侍湯藥衣不解帶者四年及卒依喪次讀禮終制未嘗出戶庭入私室嘉靖時旌其孝

蒲政崇信縣學生孝友純篤廬墓三年生平足不履公門口無擇言追踪古純儒

胥恭固原人父亡哭三日勺水不入口遂致疾終喪始愈事母呂氏年七十遵宿疾衆藥弗效恭齋沐



顧天祈以身代刲股和藥飲之母疾愈齒更生髮反  
黑壽至八十七卒人以為孝感所致

閻 漳涇州人好古力學博通經史累舉不第以貢  
入太學家居甚貧事親內外稱孝父中憲歿三年不  
入私室母疾衣不解帶朝夕親嘗湯藥母雖無疾每  
夜必數起赴寢室外察氣平息年踰六十敦行不怠  
雍朝相涇州人家素貧窘事母極孝盡力以供蔬水  
之歡母有疾弗愈朝相割股肉和羹進食而愈母沒

三年守墓不如葦歲時追慕哀痛聞者悲之

劉芳靈臺人父母合葬廬墓三年披髮頂土赤足膝行填其墓塚約五丈餘

王化靈臺縣庠生素以孝聞父染重疾化嘗糞割股父疾即愈後父卒母哭失明化顙天號泣舌舐再明及母逝與父合葬廬墓六載化盜饋食至愛弟讓產與之博施粟布以濟飢寒給藥調病捨棺殯孤時稱關西孝子

姚謹獨靈臺人為人敦厚敬慎有古君子風事親竭力承歡友于兄弟產業盡讓其弟平生好善樂施人稱為孝子義士

張企仁靈臺縣廩生葬親廬墓三年妻亡終不更娶以孝義旌表

薛湘華亭人天性至孝母沒廬墓三年

張四恩華亭人家有蓄貲喜施予不責其報萬厯中歲饑民多殍恩白縣令願出粟五百石賑之賴以全

活者甚衆事聞以尚義旌之

萬邦寧靜寧人家貧力學父早逝母孀居邦寧奉養竭力母病醫藥哀號動人及卒廬墓三年

高位靜寧人親疾祝於天割股以進親疾尋愈及卒廬墓三年後經旌表鄉黨稱為高孝子云

董魯隆德廩生母李氏病危昏憤七日魯顙天割股合藥以進母病隨愈壽登九十人以為孝感所致王秉衡字初暘平涼人萬歷乙酉舉人仕至河間府

同知性孝友嫂性嚴每怒詈令其妻跪受之兄死遺  
子四人皆撫訓為諸生以已產分諸姪與子適均遇  
諸族人及內外親無一不篤厚教子姪甚嚴遇賢士  
必敬禮聞人有過常正言責讓一時鄉里士人咸敬  
憚之

張麟字天瑞靈臺人以歲貢授榮河丞清廉奉公  
子病思食魚僧饋一魚給以俸米歷任六年或公出  
受民食必以俸給價居家執喪三年不與妻言每遇

生日靜坐哀思滋味不入口適邠州遇盜刦所乘騾  
并行李曰此騾非鞭不行吾尚有鞭以遺汝盜驚曰  
必靈臺張古人也盡還所刦羅拜而去麟平日教人  
不倦非禮不行故邑人稱為張古人

張金榜字耀吾平凉人性剛直倜儻尚義氣聞人有  
不平事輒挺身出為直之不避權勢以歲貢授商州  
訓導州士數為強豪侵虐金榜至集諸生訓以恪守  
學規毋干紀敗度及預外事苟有非意之侮吾為爾

任無何王生某有田數十畝巨室欲之密屬州判困  
生生以田遺巨室求解金榜聞之力辭官判與巨室  
俱詣學謝讓以大義遂不奪生田李自成初陷商南  
殺令屠城監司檄金榜署縣事金榜掩死骨招遺民  
厚為撫恤請蠲田租三年舊例蠲租不蠲徭徭為縣  
費金榜一切貸之遷寧州學正歸

陳典字五典平涼人少讀書警敏開卷即能見大  
義文章力追史漢不落尋常蹊徑為博士弟子員表

表諸生間生有至性執親之喪臥苫食蔬終三年如

一日

李 楹隆德人家貧負薪以供孀母明末奇荒妻一  
子三不令分母之食妻子餓斃奉母董氏獨生鄉人  
媿美郭巨焉

董 俊隆德人與弟任並至孝俊以貢生授溫州府  
訓導歸家母喪未葬賊入城殺戮人競奔匿俊與弟  
還守柩前號泣不肯去賊不忍加害



左旋涇州人性孝友為府掾奉孀母盡禮兄轉早卒遺二子愛踰已子祖業盡以遺之與二弟友愛無間撫弟姪成立涇人推其孝友後官遼陽經歷遷雅州判郡守范岡旌其門

曹麒字文瑞華亭縣監生勤學多識邑舊事始撰縣志為人和易孝友教諸弟諸生皆有法北城土惡數潰輒徵民治之監工者因取賂剝民衆以為患舉麒督治麒使貧者負善土富者輸材木瓦石工用咸

備因繕修亭堞半載完美

張良金鎮原人山海衛教授有孝行親沒廬墓當道

上聞旌表

朱勇平涼羣牧所千戶五世同居旌表其門

石德贊華亭人萬厯間貢任夏縣少尹持躬清勤以義自律一監生有冤獄賂三百金求伸贊廉得其情卻其饋立為直之居家歲饑募邑煮粥所活者衆

陳篤靜寧州人萬厯間貢歷鞏昌階州學正母病

痿篤左右善事母逝破產營葬手植松檜廬墓三年  
丁 甸 景 樂 王重福 張廷弼 閻朝義俱  
涇州人萬厯十年大饑尚義輸粟加冠帶不就甸粟  
二百石重福六百石廷弼二百石朝義二百石樂二  
百石院旌其義

朱氏二孫平涼人失其名年甫垂髫往莊取租兄為  
賊所獲弟已潛匿聞賊欲殺兄即挺身出求以已代  
兄死兄亟麾弟去語賊曰願殺我請釋弟兄弟爭死

不已賊并殺之

皇清馬從龍固原州人歲貢任工部屯田司主事從龍九歲喪父事母孝母病衣不解帶母沒廬墓三年教幼弟及諸姪有成共爨讓產非公不入官署

王宗鶴字聞天靜寧州人順治四年貢性孝友鶴祖遺少子于鶴叔父也方數齡祖歿飲食教誨鶴必篤敬少叔學於鶴每復書鶴必立聽不敢坐有佳餚必問少叔嘗否然後舉至成人無間性不與物競家亡

驢一日馱布入門家人欲執之鶴不可曰是將為市  
商累也通庠舉優行學使欲旌之鶴固辭曰是將形  
劣者短也終身不入城市齒德兼優

胡廷佐平涼縣人由選拔歷官淮徐兵備僉事居官  
多善政處鄉里敦厚和平能周人急難時府縣兩庠  
以拖欠錢糧被黜者七十餘人佐皆代為完納悉復  
其名人咸感之

尹廷弼平涼縣人歲貢生讀書刻苦性嚴正遇物少

容事有不可即拂然去人有不善即正色切責之三  
十失偶終身不再娶人皆稱為義夫後授文縣訓導  
揚金玉固原州人城守營兵康熙十年拾里民糧銀  
二十七兩五錢還之

陳大寅固原州人孝友和睦篤於本夫七世同爨  
慶陽府

明高 雄慶陽衛人正統間兄通販淮鹽久絕音問雄  
方弱冠遍訪江淮閱數歲始知兄為鹽徒陳景諒所

殺具控江都令諒賄囑公私不得理令以利誘之曰  
汝兄既死盍相解和雄不從竟坐諒死得兄屍歸葬  
鄉人義之

衡 鏞慶陽衛人舉正統六年鄉試長鬚偉幹面如  
冠玉力學修辭不愧前人事繼母最孝鄉黨以純德  
稱之

淦 詳慶陽衛人舉景泰間鄉試父臥病三年詳躬  
侍湯藥頃刻不離日夜顙天願以身代及父歿晝夜

哭泣哀毀骨立勺水不下咽期日而死有司名其坊

曰孝子門

魏大用慶陽衛人早歲喪父孀母臥病七年大用躬侍湯藥無時刻少懈及卒哀毀過甚哭泣至於喪明廬墓三年負土成墳在衛城西原畔三里人指為孝子墳

王良慶陽衛人良方在姓父恭遠出商販莫知所之及長貢入太學遂辭母覓父所在徧歷江淮忽夢



老人曰何苦遠遊汝寧爾父在焉隨至果遇時父年八十餘不能歸良盡鬻衣裝備輿而還時稱王孝子錢經慶陽衛人早孤事母撫弟以孝友著宗族鄉里無間言死之日自士大夫以及閭巷無弗痛悼者倪斌慶陽衛人襲指揮父病醫藥罔效每夜焚香告天願以身代割股和羹父果瘳人謂孝感所致

劉英寧州人年二十八始奮志讀書晝夜不輟三載登成化甲午鄉舉秉性公直嘗出粟救荒全活甚

衆以親年老朝夕奉養不仕

趙璧慶陽衛右所千戶少有大節力能搏數人善騎射好讀書通春秋左傳都督仇廉器其才能拔置帳下天順間從廉出征戰於莊浪師潰廉中五矢璧以身翼蔽不去廉知其為已遂自刎璧乃奪路而出賊莫敢追後年七十餘臨終謂其家人曰吾生平所恨未得與仇將軍復讐耳子孫勿忘吾志

李恭寧州人慷慨好施成化中大饑恭捐粟千餘

石賧本州及真寧民全活甚衆州守旌其義

劉廷燧寧州人正德間鄉舉事親最孝及歿廬於墓側三年妻妾不使饋餉

趙璋環縣人事親至孝母卒廬墓負土值大水家產漂沒恬不為意卒終三年每夜有野雉伴廬而宿人謂孝行所感嘉靖間詔旌其門

楊來鳳安化人少販江淮事親以孝聞父歿年已逾七十哀痛七日不食及葬廬墓三年事母朝夕不離

至白頭強為壯容娛母母壽逾九十人以老萊子擬之嘉靖間詔旌其門

楊雲鳳安化人字應祥太學生為汾州吏目頗以清幹聞為人倜儻好施予嘉靖戊子歲大饑雲鳳與弟雛鳳設法全活頗衆丙午邊事嚴急南關居民數萬人一時爭入門有死者賊退雲鳳倡率居民請於官願捐已貲築城以為民望不期年而告成郡人賴焉已酉大水暴漲南關居人漂沒殆盡獨雲鳳一門無

大小得登前樓免患人以為陰德之報

趙一夔安化庠生嘉靖己酉秋大水南關居民漂沒殆盡夔為人所援得登岸聞母已溺復投水覓之不得俱死有子方數歲亦同入水忽於波浪中得渡人謂孝感所致

蔡蕃慶陽人為人莊雅溫厚言動循禮少有文名父病扶掖起居奉侍湯藥未嘗離側初授寧國丞有政聲以母憂復除費縣陞太寧令民有去後之思歸

隱於河西園每入城市見其皓首龐眉人爭從之以為耆德歸焉

康 錦慶陽人世襲千戶有膽畧敵寇邊將至城下錦單騎往探之遇敵前鋒即短兵突擊身被數創卒能拔歸母歿哀毀骨立又念祖父陣亡三世皆寄殯各邊特匍匐與櫬歸葬即廬墓側負土築封踰年親友以錦衰年乏嗣強之歸不從其忠孝蓋天性云

閻應儒字一菴寧州人隆慶庚午經魁性至孝幼家

貧茹苦攻帷志期顯親初授山西孟縣教諭歷陞雲南廣西府通判所至有政聲時滇洞苗為亂應儒出奇制之克就底平致仕歸賙鄉里恤宗族年七十餘歿市巷皆為震哭

李澄環縣人母病二年雙目俱盲求醫百方弗效澄自檢藥書得羊肝補目之說乃日以羊補不若以人補以子補母是為還元其效必矣遂焚香告天刺脇割肝一片和羹以進母食之一夕病釋雙目復明

澄亦無恙人謂至孝感神呼為李割肝子杲以恩拔  
佐獲鹿忠蹟在獲鹿志中

李棟澄之子早失怙母罹風疾百治弗效因建孫  
真人祠朝夕泣禱後夜夢一道人來醫病果愈

荀鉤環縣人天資孝友賦性磊落不事詩書而禮  
義不失大節凜然嘗督修庠序每出已資以助有司  
重之與列鄉飲事嫂節婦周如母待姪志仁無異已  
出德義著鄉里



張經合水人三世同居經益敦孝友且賦性慷慨年饑輸粟賑貸歲熟貸者償之不受人目為義士

曹瀛寧州庠生家貧至孝父死京邸不能舁歸徒跣負骨而還樵採奉母母疾篤泣禱潛割股和羹以進母遂愈士民公舉府州表其門

王復古寧州人七歲失怙母年二十五守節撫育稍長奉母盡孝母嘗患一頑瘡百方罔效幾危古泣禱自割股啖母旬餘大愈母年八十四

董八紘寧州人貢生父歿廬墓頂土築墳後母病篤  
醫藥弗瘳紘願以身代偶遇一僧望氣投餌母  
飲之吐塊如石而愈覓僧竟不知所之咸服神異督  
學旌其孝

傅偉寧州人母久病目瞳反背貧不能延醫哭禱  
於神自割股肉假湯藥跪進病頓愈瞳睛如初

陳志聰寧州人親歿廬墓三年手掬土成墳鄉里重  
之

強不息安化人節孝傳家親歿廬墓於河西樊家坪  
負土三年未嘗少懈天啟丙寅欽賜節孝雙全碑

楊維勤安化人節婦強氏子事母至孝博物洽聞經  
史過目終身不忘家貧廣授生徒藉束修以奉母雖  
身無完衣而事親必極滋味

方允德環縣人庠生性至孝敦睦族黨尤尚氣節賙  
貧乏曾焚券百紙遇變堅守孤城死難

李萃安化人廩生父病祈禱願以身代及闖賊破

城力戰被執大罵賊義釋之創建義學造就邑中子弟人感其德所著有志孝圖解

仇傳香真寧人中庚午鄉舉事親至孝朝夕定省四十年如一日父病五載日侍湯藥父減粒則已輟食嘗糞以驗其輕重居三年喪哀毀骨立事繼母友兄弟內外無間言

楊光才寧州人事親以孝聞嘗遇失金投河者詢其數以二十金對才出已囊償之明末歲饑捐資賑粥

全活者衆督師洪承疇餉匱才以豆二百餘石慨助  
王師督師義之旌其門

粟有恩寧州人性長厚嘗出粟救荒不留餘資郡士  
大夫稱重之州守屢延鄉飲固辭不赴楊督師撫賊  
神一魁等恩慨以身許質於合水賊義之拱手以降  
當道屢旌其門

朱用賢字蓋齊寧州人生員孝繼母撫幼弟助人婚  
葬周給貧乏嘗焚券百餘紙倡衆捐資砌南門坡成

南河橋董建文昌閣勸人為善至老彌篤年八旬無疾而逝

楊光柱寧州人明末屢遇奇荒俱出粟賑貸負債貧不能償者焚其券三百餘紙鄉人德之

王僖寧州人明末大饑斗粟三兩貸粟數百石以活人不計其償

閻鳴陽字文瑞寧州人博通經史善屬文孝弟謹樸親睦族黨尤好施予賑飢恤苦罄囊橐以行其志垂

老甘貧畧無怨言督學使優旌其門

王訪環縣人因兵馬缺糧捐米豆五十石兵丁得食大獲全勝將領官給銀二百五十兩堅辭不受有司旌其門曰義助軍糈

李芳安化人李自盛家僕主既破家寄食於芳芳事之愈謹適賊有仇芳者執其主縛之且曰我得芳乃釋芳主遂毅然赴之主還芳見殺

皇清穆三益真寧縣人母歿頂土築墳廬墓三年

甘州府

漢吳詠張掖人為護羌校尉馬賢所辟後為太尉龐參掾參賢相誣罪應死各引詠為証詠計理無兩直遂自刎死參賢慚悔自相和釋晉涼州刺史張軌祭其墓而旌其子孫

元寧豬狗山丹衛人母年七十餘患風疾藥餌不效豬狗割股啖之遂愈歲餘疾復作不能行豬狗手滌溷穢護視甚周造板輿載母夫婦共舁行田園以娛之



後居喪盡禮鄉人稱之

明徐行甘州人儒學生少喪父事祖孝成化間祖卒廬墓都御史唐瑜奏請旌表其門弘治壬戌母病復割股啖之

毛剛甘州右衛軍性至孝居喪廬於墓側有司上其事旌表其門

應壽甘州後衛軍家貧竭力事親母病割股啖之後父母俱喪壽結廬墓側三年不飲酒不茹葷朝夕

悲號止有一子或月一至以饋菽粟

皇清馬負圖張掖人明末闖賊陷城巡撫林日瑞抗節被害一門俱殉無收殮者負圖同郡人賈大玉收日瑞並其家人屍殮之後負圖令其子天祿大玉令其子文衡為扶櫬送歸故里巡撫黃圖安大加優獎給額以旌之

賈大玉見馬負圖事內

馬俊昌張掖人順治初年闖寇雖平甘鎮兵餉莫給

昌助銀五千兩以濟軍需總鎮旌其門曰捐金助國  
後逆回之叛黑城兵糧不足昌復助一月糧兵賴以  
安張勇時為總兵至其家深嘉慰之

張毓秀張掖人性至孝時年十八其父歲年六十久  
病諸藥無效秀割股佐湯藥以進父病遂愈越三年  
父以無病端坐而逝

劉子奮甘州鎮營兵路拾遺金五十兩待至次日失  
主至原封與之

姚 廉張掖人監生自幼孝心篤摯竭力事親先是  
母卒因父老不得遂其廬墓之志在家長齋茹素三  
年及父卒遂廬於墓側寢苫枕石晨夕哭奠至雍正  
三年冬廬墓將及三年會值生辰酌祭一慟得病死  
於墓所雍正七年具題

旌表

涼州府

明魯 麟字玉書平番土司人官南直提督恂恂有儒

將風尤重士大夫語所親曰勿為南人所笑洎致仕  
家居好義樂施建修學宮泮池捐助腴田百畝為宮  
牆補葺費值歲荒散米麥千石周鄉黨急煮粥全活  
飢民甚衆人皆呼為活我魯公

石韞璧字德輝古浪縣人弘治時廬庶母邸氏喪於  
西山下孤守三載猛虎入園者數並未嘗遇害人皆  
駭異以為孝感所致有碑勒孝行載入縣志藝文內  
孫奉先永昌縣生員朝夕供子職盡禮父母有病輒

顧禱求欲代及卒哀毀骨立及葬後廬墓三年

武登雲永昌縣人父病欲食肉苦無資遂割股肉以奉父病果愈

顧言平番人事母彭氏啜菽飲水極盡其歡弘治八年母年八十有七卒言時六十有七以號慟而歿李讓平番人性孝友與弟訓甚歡愛訓卒每時號哭父喪廬墓三年年八十一卒

皇清郭懷德武威貢生素以孝聞父病親嘗湯藥克盡子

道及歿廬墓三年

魯大誥字慎九平番土司性寬和好義嘗置義田以贍宗族焚契券以免貧累又以郭外東南地水利不通輸金買沿途地修濬溝渠資灌溉者十餘里邑人德之

張允澂武威例監居城北陳春堡置朱家莊一處價五百金允澂念窮鄉荒僻子弟多因貧寒不能學遂建義學捨其地為義田每年以所出租作束脩紙筆

之資鄉隣高其義刊立碑記

劉英武威人素肄醫業一日其子於路拾金白英  
英曰積金不如積德不可私藏須還之少頃邑庠生  
尹思任尋至英問其數曰八十兩慨然與之

寧夏府

唐侯知道程俱羅俱靈州靈武人居親喪穿墻作塚皆  
身執其勞鄉人助者即哭而卻之廬墳次哭泣無節  
知道七年不止垢塵積首率夜半傳墳踴而哭鳥獸



為悲號李華作二孝贊表其行曰厥初生人有君有親孝親為子忠君為臣兆自天命降及人倫背死不義忘生不仁過及知就為之禮文至哉侯氏創巨病殷手足胼胝以成高墳夜黑颺動如臨鬼神哭無常聲迥徹蒼昊宜斬三年爾獨終身嗟嗟程生其哀也均顧後絕配瞻前無隣

明王 網字子紋寧夏指揮綸之弟母喪廬墓足不履城郭者三年事聞宣德中旌表

安廷瑞寧夏監生自始祖安禮保至千戶廷璧與廷瑞六世百口同爨家門雍肅事聞旌表

茅 貴寧夏人正統五年寧夏大饑都御史金濂請於朝設預備倉勸鎮人之尚義者各輸粟三百石以賑飢奉旨旌表其門同時輸粟者有杜海朱裡焦原趙友德虞海韓寅黃銘葉榮孫俊繆顯葛謙陳祥張敬唐顯管矩吳仲名並貴十七人

吳 過寧夏人嘉靖庚子舉人歷任袁州府同知嘗

出廩粟賑飢多所全活後聞變為母棄官官著廉明  
鄉稱孝友

徐 勇靈州人事母孝謹母年九十有四勇自少至  
老凡飲食起居未嘗刻離鄉黨稱之遭劉東暘之變  
率守孤城兩獻俘馘

趙 誠靈州人奉繼母孝母歿朝夕哭奠齋戒三年  
如一日

李 雲寧夏人父兄罹時劉之害最慘雲以遺腹子

賴母氏苦節鞠成陞左參將奉母盡孝居官盡職尤熟練屯政致仕後當事委重挑濬渠工

萬人重寧夏人明季道拾鏹三十兩係旗甲張加義完官租之銀人重悉以付之

明三畏寧夏人明末輸粟三百石以助兵餉

陳謨萬厯間中衛庠生與西安客孫尚義友善孫病故遺子尚幼謨撫之如已子孫子長將回籍謨舉其父所寄銀百兩米百餘石付之錙銖不染

皇清鄭興基後衛花馬池人為後衛弟子員值年荒其父  
為虜掠去興基詢知父在板城隻身徒步趨父所板  
城在北口外道經山西時晉省大旱人相食興基奮  
不顧身決意長往尋至殺虎口得達板城父子相見  
抱持大哭見者俱感動有喇嘛僧憐其孝贈馬二匹  
銀十兩衣二襲令其歸興基遂奉父旋里

馮爾暉寧夏人順治丁酉副榜孝事節母王氏母終  
爾暉廬墓三年

馬中驛寧夏等衛學生至性過人嗜先儒語錄每日正襟默誦親喪廬墓三年鎮人稱之

岳應孝咸陽人寄居中衛推魯愿謹素貿布有貲數百金人貸輒與或不償亦不往索夫婦織毛資生少有所積猶濟貧不已鎮靖堡被賊陷有王氏老嫗無所依應孝迎養于家貧者生子不育棄於野犬齧之血淋漓尚未死孝見而抱歸覓婦乳之長成醫足齧痕猶在也有賣兒於他鄉者母子號泣不忍離孝與

原值贖歸道拾金持白於市三日未得其人歸納之  
確中越數日有踵門哀求者質其數符還之其行如  
此

周調元後衛庠生年十四為流賊所掠置營中賊復  
掠得子女數十閉之空室令調元守之調元放之而  
身亦乘間脫歸事親誠孝寓館中有竊其衣物者知  
而弗言康熙三十年西安饑有馮畫者出外其妻為  
父所驚一日相遇夫妻對泣不忍捨調元出銀贖歸

之

西寧府

明張文學字元素西寧人成化間以歲貢選山西隰州吏目為官清廉有政聲居家長厚推誠待人藹然有古君子風

張萊西寧人國學生性篤孝友父母有疾晝夜侍湯藥不一入私室居家以寬持身以儉處里閑以恕以子問仁貴屢封山東按察司僉事



皇清柴自建西寧人年三十妻鄧氏故遺子宗續甫二歲  
別無婢媵誓不再娶躬親菽水茹檠訓子歷四十六  
載

賀增壽西寧永安堡人豪俠好義和睦宗黨周急濟  
貧人多德之雍正元年逆夷羅卜藏丹津寇北川官  
兵赴討時天氣嚴寒增壽以皮衣三百餘件散給守  
禦兵丁又捐大布二百餘疋縫袋盛土置之城闌蔽  
賊矢鏃兵有所恃城得保全

楊永華西寧人賦性仁厚樂善好施夏捨鎌鏟冬捨衣袴康熙四十一年歲饑道有餓殍華煮粥醫藥毫無倦色於無主屍骸捨棺收葬以千計市井中有貧不能葬者捐資瘞於所置義塚凡婚喪乞貸者應之並不取償壽至七十一歲端坐而逝其子太學生志遠亦克繼父志

馬雲龍字御霄寧邑太學生性篤孝友五世同居和睦無間言且輕財重義樂善好施每春耕時散種於

鄉貧者不取值康熙四十一年歲饑米價騰貴龍盡  
出所積以濟貧乏賴以全活者不可數計設家塾延  
師以課宗族子弟遇有差徭龍獨任之不使累及鄉  
隣見人鬪訟諭以情理曉以利害排難解紛必不使  
爭訟鄉人重之

直隸秦州

元畢也速答婁穆爾氏元時家秦州父喪廬墓次晝夜  
悲號有飛鳥翔集墳土踴起之瑞

明王 英秦州衛軍少孤事母孝母卒英廬墓所跣足負土者三年時暴雨害稼墓側禾稼無損有司上其事旌表其閭

謝繼昭秦州人父卒繼昭廬於墓哀慟悲號三年如一日乃有馴鹿產芝之異有司以聞詔旌其閭

夏 時字尚寅秦州禮縣庠生事母孝母卒既葬遂不問家事獨廬墓側穴寢匏食僕供薪水者亦不許入墓所每雞鳴戴土於斗跪敷於塚塚大如屋初葬

鳩傍穴為巢將禪兔孕於穴人以為誠孝之感州守表章其事後以貢授敘州府照磨

丁儀秦安人父泰官知事歸儀日侍左右父嬰疾醫藥無效儀惶懼求代乃號泣於天百拜以禱因割左股以進父疾愈

張之渠秦州人參政潛子嘉靖癸未舉於鄉卒業國學歸省母母病兼程抵家母病延醫衣不解帶禱天以身代母歿哀毀踰禮既葬冬夏不扇不爐雪夜伏

墓而泣墓所有烏鳥群集泉水湧出之異

潘 弘秦州人成化間隴右饑弘輸粟千石有司聞  
於上勅賜冠帶

孫居業秦安人幼失母事父孝敬備至廬墓三年奉  
文旌表

安期晟秦安廩生賊陷城以身護母被賊殺害

蔡廷棟秦安人明末奇荒罄家所有得粟百石輸官  
賑飢事聞詔旌以仁人立達錫命冠帶

雍 周清水人有才畧善經營白手致萬金賑困救  
急扶助才俊之士著名隴右嘗行遊天下訪交賢善  
惟以惠施廣濟為務貧者至折券雖千金不顧巡方  
使聞其賢欲表以官固辭不願令畫工繪其貌持以  
厲俗及其歿也萬金已罄家貧自若

項 謙清水學生少喪父事母至孝母疾謙割股啖  
之母終廬墓三年旌表

張孔教清水庠生父喪明母多疾孔教侍左右未嘗

少離及卒廬墓三年

雍泱宮清水庠生事親至孝及卒廬墓三年鄉人稱揚邑令旌表

康天保清水庠生居弓門寨賊尅其堡以威脅之使從大罵不屈死兵巡副使為建凜有生氣坊

馬班才清水書生居代家堡強健有力善騎射賊破其堡欲脅以從痛罵不屈賊怒縛于樹樹為之拔亂矢射之至死罵不絕口



丘陵清水圻者為賊所獲逼之攻城罵曰要殺便殺我不攻我城賊殺於城下

趙一岩禮縣人以選貢赴監監期止少一日聞母訃人勸次日舉哀監事滿矣一岩不從歸廬墓三年一方推重後仕絳縣主簿

馬根學禮縣人流賊作亂獲其父應勛將殺之根學泣告曰請以身代賊從其言竟殺之

任希夔徽州人正德辛未流賊刼掠城幾陷希夔獨

呼隣人陳鸞等登城與賊戰竟日殺傷甚多賊幾退  
中流矢死御史以聞命下旌表

梁基恩陳邦登俱徽州義勇明末率兵逐賊至白水  
江衝破敵鋒多所克捷後深入重地遂被害憤罵不  
絕有司旌其門曰真男子

楊其昌何養德俱徽州武生流賊犯境率義勇何獻  
祥等戰於銀杏鋪賊大至圍之血戰愈厲矢盡被害  
有司表之

皇清梁必擢秦州人家傳孝謹五世同居時人以方張公  
藝必擢亡妻陳氏主家五十餘年長幼百口咸相敬  
愛無間言

吳殿契秦州人性長厚時鄉民劉弘失銀契拾還之  
一夕聞穿壁聲意必某為盜也因呼曰天寒胡為此  
或饑餒莫支明朝來資汝汝去我不汝洩嗣出城晚  
歸遇刦者數人于道一人前急止之曰吾恩人也毋  
相逼且拜謝不洩恩因諭其人勿復為盜兼給以貲

其人感悟卒為善類

直隸階州

明張文貴文縣人洪武初補百戶張嘉因逼亂挾為謀  
主不從與弟文富同被害弟文才陰與居民馬桑者  
軍人巨伍兒倡率土人捕嘉亂遂平洪武二十八年  
以功陞千戶

卯應辰階州人垂髫知孝母杜氏卒哀毀踰常廬墓  
三年飲食服用皆純素每食必涕泣嘉靖間御史臺

遣使慰問旌其閭

喬挺成縣庠生性至孝總角時即知定省鄉人譽之父母既歿泣血骨立三年不出戶窺園既葬廬墓每日負土積塚時有白兔繞其塋有司聞於上賜之冠帶邑皆以孝子稱之

李晉文縣貢生任宜陽主簿事孀母以孝聞及終哀毀過情祭葬如禮三奏闕下告陳親節得建坊旌表人稱其孝子思忠性亦純孝途聞母訃一慟幾絕

水漿不入口者七日哀毀骨立三年如一日以此抱恨終天朝夕不離父側依戀如嬰兒人稱有父風楊忠文縣人其父為賊所執挺身赴救父得脫忠遂為賊所嚮殺

李碩馥文縣人性至孝父死三年不出戶庭斷酒葷哀毀如一日事母備盡孝養舉德行

蘓藩成縣人年甫三十妻亡不再娶或勸之藩曰娶妻為後也業有子矣復娶何為子身居室四十餘

載非禮不行教子課孫一堂五代鄉族稱為義夫公  
舉鄉飲各官旌獎免其雜徭壽九十三歲

魏 瞻階州人家貧鬻販以養親親所欲必竭力奉  
之親歿廬墓三年未嘗返室

徐應麟階州人貢於鄉以孝聞父母亡哭泣躃踊水  
漿不入口者數日葬廬墓三年蔬食飲水奉旨旌曰  
榮旌實孝

李自英翟化鵬俱階州生員明末李賊陷階州罵賊

被害同時死者有貢生趙維新李桂枝徐養氣劉顯  
名苟大魁五人生員則有趙茲祚馬大亨司寧汪得  
溥孫振業蘓民泰楊州牧郝升高馬呈圖郝升遠劉  
應龍董國士司儋趙人龍趙思賢巨卿徐景思徐景  
曾徐景孟凌熙秦寇來源趙朱正趙州牧賈邦偉蹇  
恒濟邢必動二十六人

王賢階州人年十五喪父事母以孝聞家貧棄儒  
商吳楚間累致千金性豪俠喜施予有貸貲貧不能



償者即焚其券里中構訟遇賢輒解人高其義

葉見陽文縣布衣家徒四壁安分無營循循雅飭古貌古心屢舉鄉耆不受享年百歲

權本時成縣國子生任東平州判轉經歷回籍遇賊陷城力抗不屈賊誘之降大罵不休賊怒遂亂鞭而死

丘維嵩成縣歲貢賊破城力敵不勝而死

武述文文縣廩生流賊攻縣甚急邑人奔逃文混出

城外傍視無母輒泣臥地旋挺身入賊夥扶母而出  
賊逼之罵賊不屈母得全述文被殺

李元朴成縣人舉癸酉鄉試七年城陷朴與其父廩  
生華國俱被繫父子抗罵不屈賊滅其家

直隸肅州

唐薛萬備居母喪廬墓太宗表其門仕至左衛將軍

明芮攀龍肅州衛人父承誨早逝龍奉母至孝朝夕起  
居未嘗離側孺慕之誠有如一曰

顏 秩肅州衛人年三十歲妻亡誓不再娶處家有  
序教子有方鄉人稱為義夫

顏希孔秩之孫幼凜家訓奉祖三十餘年未嘗少忤  
鄉人稱為順孫

甘肅通志卷三十八

欽定四庫全書

甘肅通志卷三十九

隱逸

唐虞聖世亦有巢由巖穴之士脫屣浮榮甘心肥遯  
衡泌自適考槃寤歌高風亮節遺世獨立自古在昔  
先民有作未可沒也編次如左志隱逸

臨洮府

明顧敬字允恭蘭州人少聰穎秀拔涉經史尤長書

法與段堅聊讓友善言動有儀晚年好學彌篤年八十卒有文稿

顏宗魯蘭州人性坦直不阿善書能詩文隱居自樂鄉評雅重

周詢金縣人辭榮棄祿隱居養親足以表正鄉閭馮庸字定之蘭州人敦德尚行通春秋博子史喜真草明代典章一一手錄成帙言談必根道義行檢必循禮度恬靜自守不求聞達人稱為博古君子云

漢 德金縣人隱居不仕絕迹名利尤遠避權勢鄉人以孤清高潔稱之

張九疇字天錫狄道人器宇宏偉動有矩矱杜門不出絕口不言功名足迹不至公府探討經史從學者甚衆所著有五經考學庸節解拙齋文集

王伯良字志善蘭州人潛心禮義之學言動不苟取予必以義不妄交人不干謁貴顯有準庵集東山樵唱

卷三十九  
鞏昌府

周伯夷叔齊孤竹君之二子當紂時兄弟遜國聞大王  
善養老乃入周就養及武王東伐紂扣馬而諫至周  
有天下伯夷叔齊恥之不食周粟隱於首陽山采薇  
而食餓死按曹大家注幽通賦云隴西首陽縣有首  
陽山邑人楊恩有首陽辨

漢任 棠漢陽上邳人有奇節隱居教授漢陽太守龐  
參初到先候之棠不與言但以薤一大本水一盂置



戶屏前自抱孫兒伏於戶下主簿白以為倨參思之  
良久曰棠是欲曉太守也水者欲吾清也拔大本薤  
者欲吾擊強宗也抱兒當戶欲吾開門恤孤也於是  
歎息而還皆用其言為名太守

姜 岐漢陽人守道隱居名著西州太守橋玄欲召  
為吏岐稱疾不就玄怒逼致之督郵尹益固爭得免  
岐卒堅卧不起

晉朱 冲字巨容南安人少有至行閑靜寡欲鄰人失

犢認冲犢以歸後得犢大慙以還冲冲竟不受有牛  
犯其禾稼冲屢持芻送牛而無恨色主愧之乃不復  
為暴咸寧四年詔補博士不應冲每聞徵書輒逃入  
山時人以為梁管之流冲居夷俗羌人奉之若君冲  
亦以禮讓為訓邑里化之道不拾遺村無凶人毒蟲  
猛獸皆不為害

董京字威輦初與隴西計吏俱至洛陽被髮行吟  
嘗宿白社中時乞於市得殘碎繒絮結以自覆或見

人排辱曾無怒色孫楚時為著作郎數就社中與語  
遂載與歸京不肯坐楚貽之書京答以詩後數年遁  
去莫知所之

元萬敬儒寧遠人家貧嗜學不倦與人說書輒竟日棲  
止東郊畫水竹以自娛忽報朝使至抱琴踰垣而走  
不知所終

明王輔安定諸生博極羣書應貢入京遂隱不出講  
學於木坡諸生重趼往從之講論經史數十年不入

城府縣令黃沂請為鄉飲賓輔笑謝之至今鄉人稱  
儒者高蹈必以輔為首

李文燦伏羌人洪武初舉人資性穎異夙學天成自  
負經書避兵石門數年乃還持身清苦以教人為已  
任終身不仕

平涼府

漢王符字節信安定臨涇人少好學有志操與馬融  
張衡崔瑗等友善當途者更相薦引而符獨耿介不

同於俗以此不得升進志意蘊憤乃隱居著書三十餘篇以譏當時失得不欲章顯其名故號曰潛夫論後度遼將軍皇甫規解官歸安定鄉人有為鴈門太守者去職還家謁規臥不迎有頃白王符在門規驚遽而起衣不及帶屣履出迎援符手而還與同坐極歡時人為之語曰徒見二千石不如一縫掖言書生道義之為貴也

石得林安定人建安初客三輔就學於宿儒樂文博

始精詩書後好學靜默關中亂南入漢中不治產業  
不蓄妻孥常讀老子晝夜吟咏漢中破還長安人與  
不取問姓氏不言

唐牛意仁字行恭安定鶉觚人大父通秉志守道交辟  
不起仁樂道丘園屢空宴如或勸之仕但笑而不答  
開元六年卒於伏羌官舍以子仙客贈涇州刺史

宋樊處約崇信縣人建中靖國年進士文章氣誼為當  
時第一流值亂隱居不仕或以仕強之約慨然曰我

宋人也死且為宋鬼忠臣豈事二主哉不食而卒人咸義之以方謝疊山

明孫一元字太初平涼人嘗棲太白之巔故號太白山人善為詩風儀秀朗攜鐵笛鶴瓢徧遊中原齊魯南涉江淮吳越時劉麟以知府罷歸龍霓以僉事謝政並客湖州與郡人陸琨吳充招一元入社稱茗溪五隱舉人施侃勸之娶乃妻以妻之妹張氏生一女而卒充等葬之李夢陽有太白山人傳

直隸秦州

漢趙壹字元叔漢陽西縣人體貌魁梧望之甚偉而恃才倨傲為鄉黨所擯乃作解擯光和初舉郡上計到京師時司徒袁逢受計計吏數百人皆拜伏庭中莫敢仰視壹獨長揖而已逢望而異之延置上坐因問西方事大悅顧謂坐中曰此人漢陽趙元叔也朝臣莫有過之者往造河南尹羊陟尚卧未起壹徑入上堂臨之因舉聲哭門下皆驚陟知其非常人乃起



延與語大奇之陟明旦大從車騎造壹時諸計吏多  
盛飾車馬帷幙而壹獨柴車草屏露宿其傍延陟前  
坐于車下陟遂與言談至曛夕極歡而去曰良璞不  
剖必有泣血以相明者矣陟乃與袁逢共稱薦之名  
動京師及西還道經弘農過候太守皇甫規門者不  
即通壹遂遁去規聞壹名大驚乃追書謝之壹報書  
遂去不顧州郡爭致禮命十辟公府並不就終於家  
著賦頌箴誄雜文十六篇

郭整秦安人漢安帝順帝時公府八辟公車五徵皆不就世仰其高

晉楊軻天水人易學精微養徒數百嘗食麤衣褐悠然自得受業者非入室弟子莫得親言劉曜徵拜太常固辭不起隱于隴山曜敗秦人東徙軻留長安石季龍備東帛安車徵之軻以疾辭迫之乃發既見不拜與語不言有司以軻倨傲請從大不敬論季龍不從下書任軻所尚軻在永昌季龍每有饋餼輒口授

弟子使為表謝其丈甚美季龍乃密令美女夜以動之軻蕭然不顧遣壯士臨之以兵并刼其所賜衣服軻不言了無懼色嘗土牀布被下無茵褥賴川荀鋪好奇之士造而談經軻瞑目不答鋪發被露其形大笑之軻神體頽然無驚怒之狀時咸以為焦先之徒未有能量其淺深也後求還季龍送以安車蒲輪蠲十戶供之自歸秦州仍教授不絕

郭 荷字承休畧陽人也六世祖整及荷世以經學

致位荷明究羣籍特善史書不應州郡之命張祚遣使者以安車束帛徵為博士祭酒使者迫而致之及至署太子友荷上疏乞還祚許之以安車蒲輪送還年八十四卒諡曰玄德先生

明周 蕙字廷芳山丹衛人後徙家秦州年二十聽人講大學首章惕然感動始知讀書為臨洮衛軍戍蘭州聞段堅集諸儒講學時往聽之有聞即服行久之諸儒以為畏友有疑與訂論焉遂殫心五經篤信力

行為一時學者之宗恭順侯吳瑾鎮陝欲聘為子師  
固辭不赴或問之蕙曰吾軍士也召役則往役若以  
為師師豈可召哉瑾親送二子於其家以受教始納  
贄焉後隱居秦州之小泉因以為號秦人感化其德  
西安李錦薛敬之咸執弟子禮嘗正冠婚喪祭之禮  
以示學者秦人至今遵之迨老以父遊江南訪之沒  
於揚子江人皆稱其孝而悲其死云

文蔚秦州人萬厯間武進士精韜畧識天文高卧

不仕秦王聞其賢聘見語竟日歎為天下奇士尋辭  
歸終日靜坐斗室經畧張鄂序征蜀庭臣薦其才強  
起參軍務蔚至蜀出奇制勝數窘賊夜觀天象忽曰  
無以戰也不三日敵必歸命果如言捷上詔勅賜蔚  
指揮劄固辭後有人與蔚善詢之曰明祚盡矣後人  
始歎以為神

雍康年字安夫清水學生以詩禮繼先傳篤經史不  
樂仕進追崇孝行修復古制建先祠立宗法制祭田

修家塾躬行文公四禮教訓宗族表率閭里著族約  
會則家鄉禮要二書刊布之鄉人尊為敦禮先生

直隸階州

明龍 正階州人幼英敏過人精於易學遇金牌道人  
傳授六壬占驗多應正德壬申蜀寇猖獗都御史召  
之贊畫每戰多捷番夷入寇總督聘居帷幄出奇數  
勝欲授以官不受奏賜金帛冠帶後總督楊張鄧徵  
聘皆不就所著有八陣圖太乙成局奇門集要六壬

書

直隸肅州

漢侯瑾字子瑜敦煌人少孤貧依宗人居性篤學恒傭作為資暮還輒燃柴讀書居恒以禮自牧獨處一室如對嚴師州郡累召公車辭疾不就作矯世論譏刺當時隱居山中殫思著述作應賓難以自寄又按漢記撰中興以後行事為皇德傳三十篇行於世餘作新文數十篇多亡失西河人重其才品不敢名稱



為侯君云

晉宋 纖字令艾敦煌人少有遠操沉靖不與世交隱  
居於酒泉南山明究經緯弟子受業三千餘人不應  
州郡辟命惟與陰顯齊好友善張祚時太守楊宣畫  
其像於閣上出入視之酒泉太守馬岌造焉拒而不  
見岌銘詩於石壁曰丹崖百丈青壁萬尋奇木蒼蔚  
鬱若鄧林其人如玉惟國之琛室邇人遐實勞我心  
纖注論語及為詩頌萬言年八十篤學不倦諡曰玄

虛先生

汜騰字無忌敦煌人惠帝時舉孝廉為郎中屬天下兵亂去官還家太守張閎造之閉門不見饋遺無所受散家財五十萬以施宗族柴門灌園琴書自適張軌徵之為府司馬騰曰門一杜其可開乎固辭

郭瑀字元瑜敦煌人少有操行東遊張掖師事郭荷盡傳其業精通經義雅辯談論多才藝善屬文荷卒瑀服斬衰廬墓三年禮畢隱於臨松薤谷鑿石窟

而居服栢實以輕身作春秋墨說孝經錯緯弟子千  
餘人

索 統字叔徹敦煌人少遊京師受業太學博綜經  
籍遂為通儒明陰陽天文善術數占候司徒辟除郎  
中以避亂歸凡所占夢靡不驗太守陰澹從求占書  
統曰昔入太學因一父老為主人其人無所不知有  
似隱者統因從父老問占夢之術審測而說實無書  
也澹命為西閣祭酒統辭曰少無山林之操遊學京

師交結時賢希申鄙藝會中國不靖欲養志終年老  
亦至矣不求聞達又少不習勤老無吏幹濛汜之年  
弗敢聞命澹以束帛禮之月致羊酒年七十五卒於  
家

甘肅通志卷三十九

欽定四庫全書

甘肅通志卷四十

流寓

名賢高士過都越國旅寓棲遲或因事羈留竟至畢  
世足蹟所經山林生色遺風流韻後人景仰爰紀姓  
名以資觀覽志流寓

臨洮府

明徐蘭字與善浙江開化人洪武初任邵陽知縣謫

成蘭州衛復舉國子助教調崇仁縣丞永樂元年聘  
典京闈鄉試致仕復歸於蘭尋又南還卒著有書經  
體要

解 縉字大紳江西吉水人洪武二十一年進士授  
庶吉士上封事萬言論時政剴切上數稱其才諸大  
臣皆忌之上慰諭賜鉶遣歸令讀書十年後來用後  
因有司劾縉違詔奔喪謫河州衛吏後召為翰林待  
詔永樂二年擢右春坊大學士

耿復初字明善合肥人性聰敏博通經史尤敦孝友  
元末歸附李文忠廉其賢授中書省使居於杭洪武  
間謫戍蘭州衛二年母尚留杭不遠萬里迎母就養  
讀書課子造次顛沛守仁義如一日嘗玩易至節之  
六四歎曰宜退而進殃也可止而止無咎自號安節  
老人年八十而卒

謝 圓字友規浙江四明人洪武中以事謫臨洮為  
府學掾學富才敏文雅而思深受知當道郡弟子員

金史卷一百一十五  
卷四十一  
皆從之登第者甚衆尋以例釋歸

丁晉字希敏江南崑山人洪武中謫戍莊浪衛永樂中被選為肅府儀衛司校尉性鯁介明醫術善吟咏尤精於畫所著有樵雲集

沈繹字成章江南吳縣人洪武間謫戍蘭州衛精醫道敦志節善琴書所著有醫方集要平治活法繪素集芝軒餘興

潘若水江西人為翰林待詔以事充吏於西寧往來



於蘭與沈丁輩遊善詩為蘭士大夫所重

楊志善浙江杭州人遷河東鹽運司洪武間謫戍蘭州衛善屬文不事生產與范繹丁晉善齒德為人所重號稱金城三老

田中北直蠡縣人由進士任錢塘知縣洪武間謫戍肅府儀衛司校尉性醇厚尚古樸治家嚴肅人皆稱之

陳質字太素江西廣信人洪武間謫戍蘭州衛精

醫術善吟咏自少至老好學不倦有瓦甌集

游 堅字文固應天府人任山東道監察御史永樂間謫戍河西因寓於蘭有文翰存

董可善字在道浙江四明人敦德力學教人有法徐蘭為記城南書塾士林重之

慶陽府

漢馬 嚴字威卿扶風茂陵人嚴少孤從平原楊太伯講學能通春秋左氏弟敦字孺卿亦知名援卒後嚴

乃與敦俱歸安陵居鉅下三輔稱其義行號鉅下二  
卿明德皇后既立嚴乃閉門自守猶復慮致譏嫌遂  
復更徙北地斷絕賓客永平十五年皇后勅使移居  
洛陽

明張珩山西石州人正德辛巳進士由御史歷陞延  
寧巡撫總督三邊清直不阿權貴陞戶部尚書未及  
任以延綏失利謫戍慶陽七年教授生徒講論道德  
一時俊髦咸出門下所著有南川錄並文集奏議

性文山人不知何許人蓬頭垢面嗜酒善飲詩不構思百首立就字亦奇有贈衣者即裂而披之囊金不匱莫知所從來凡二十餘年死葬長安

甘州府

明劉 廌字士端誠意伯基之孫江西參政璉之子洪武二十三年襲封明年坐事貶秩歸里築室雞山下命曰盤谷丁丑譴戍甘肅尋赦還建文帝及成祖皆欲用之以奉親守墓力辭永樂年卒於家著有盤谷

集十卷盤谷倡和集二卷

郭登字元登武定侯英諸孫也正統七年從王驥  
征木麓川九年從沐斌征騰衝功皆最土木之難以  
都督僉事守大同上皇至城下登俾謝却之景泰元  
年大戰栲栳山有功封定襄伯上皇復辟謫戍甘肅  
成化初復爵卒贈侯諡忠武李東陽嘗謂武臣能詩  
者莫過郭定襄有聯珠集二十二卷行世

艾穆字純卿湖廣舉人為刑部郎諫張居正奪情

言切直謫戍甘肅嘗遊終南山水間與一時詞人結社賦詩

張慎言字金銘山西陽城人萬厯庚戌進士為曹縣令有惠政擢御史天啓時以直言忤魏忠賢謫戍甘肅明末復職歷官南京吏部尚書

涼州府

漢馬援字文淵扶風茂陵人少孤有大志諸兄竒之後為郡督郵送囚至司命府囚有重罪援哀而縱之

遂亡命北地遇赦因留牧畜賓客多歸附者遂役屬數百家轉遊隴漢間嘗曰丈夫為志窮且益堅老當益壯王莽敗復避地涼州世祖即位歸漢為新息侯拜伏波將軍建初三年諡曰忠成侯

劉般字伯興宣帝之元孫般數歲而孤獨與母居王莽敗更始即位般奔長安會更始敗與般西行上隴遂至武威般雖年少而篤志修行講誦不怠其母及諸舅以為身寄絕域死生未必不宜苦精若此般

終不改其業建武八年隗囂敗河西始通般將家屬  
至洛陽封菑丘侯

晉司馬順字子思宣帝弟魏安城亭侯通之子也初封  
習陽亭侯及武帝受禪順歎曰事乖唐虞而假為禪  
名遂悲泣由是廢黜徙武威姑臧縣雖受罪流放守  
意不移而卒

魏常 夷河內人寓京州不受禮命魏主以為宣威將  
軍夷置館於溫水之右教授七百餘人弟子事之如



嚴君由是儒風始振

明河西傭不知何許人建文四年六月燕兵入京城傭被葛衣走其冬至金城行乞市中邊地極寒傭常衣葛明年至河西依莊浪魯家為傭取傭值買羊裘披之夏或衣新布衣皆以故葛衣覆其上葛衣破縷縷或勸棄之終不可錢稍餘輒市酒肉與諸乞兒飲食力作倦自吟哦或夜聞其哭聲永樂中有京朝官至莊浪識傭欲與語傭走南山避之旬月京朝官去乃

還在莊浪數年病且死呼主人囑曰我死勿殮我西  
北風起火我勿埋我骨魯家從其言今建有葛衣先  
生祠

湯 鼐壽州人官御史弘治三年上疏劾萬安劉吉  
尹直下詔獄坐妖言罪死刑部侍郎彭韶辭不判徐  
溥力言不可使朝廷有殺諫臣名獲免鼐謫戍河西  
包 節字蒙泉江南吳縣人嘉靖間御史參劾逆璫  
擅作威福謫戍莊浪衛以章句訓童子以給衣食有

時賦詩既病薦手書寄弟色孝善事母殮以斬衰曰  
少申罔極之恩所著有湟中稿

徐文彪上虞人武廟時以布衣徵值璫瑾亂政即于  
廷中指為弘恭石顯極詆其惡瑾怒下獄廷杖謫戍  
鎮番衛

### 寧夏府

晉周 虢字孟威晉益州刺史建城定公周楚之孫為  
梓潼太守寧康元年苻秦將楊安攻梓潼虢固守涪

城遣步騎數千送母妻自漢水趨江陵秦秘書監朱  
彤邀而獲之虢遂降於安秦王堅欲用為尚書郎虢  
曰蒙晉厚恩但老母見獲失節於此母子獲全秦之  
惠也雖公侯之貴不以為榮況郎任乎太元八年徙  
之於朔方之北後竟卒於朔方

隋柳彧字幼文河東解人仕治書御史正色立朝百  
僚皆敬憚之後為楊素所忌坐罪除名徙配朔方懷  
遠鎮

明阮 或字景文錢塘人任兵科給事中其同母弟誼  
謫戍寧夏未及行而卒遂以或代戍永樂元年以薦  
者言釋於戍所復其官工吟咏尤長於駢體

陳 矩字善方江西廬陵人洪武初第進士以戶部  
主事謫戍寧夏後復官湖廣江陵知縣

直隸秦州

漢申屠剛字巨卿扶風茂陵人性方直仕郡功曹舉賢  
良方正對策罷歸田里莽篡位遂避地河西隗囂據

隴右欲背漢而附公孫述剛說曰人所歸者天所與人所攜者天所去將軍孤立一隅宜推誠奉順上應天心下醕人望為國立功可以永年囂不納建武七年徵拜侍御史遷尚書令

鄭興字少贛河南開封人少學春秋學者師之更始拜興諫議大夫涼州刺史使安集關西及朔方涼益三州會天水反者攻殺郡守興坐免赤眉入關東道不通乃西歸隗囂囂虛心禮待而興恥為之屈稱

疾不起聞囂稱王說囂不可囂乃止建武六年侍御  
史杜林先與興同寓隴右乃薦興執義堅固敦說詩  
書徵為大中大夫後坐事左轉蓮勺令興好古學尤  
明左氏世傳左氏者多祖興興去蓮勺後三公連辟  
不就卒於家

馬融字季長扶風茂陵人美辭貌有俊才博通經  
籍永初二年大將軍鄧騭聞融名召為舍人不應命  
客于涼州武都漢陽界中後會邊方擾亂自關以西

米穀踴貴道殣相望融既飢困乃應隲召拜校書郎  
班彪字叔皮扶風安陵人更始敗三輔大亂隲囂  
擁衆天水彪避難從之囂問彪曰往者周亡戰國並  
爭意縱橫之事復起于今乎對曰周之廢興與漢殊  
異方今帶州域者無七國之資而百姓謳吟思仰漢  
德乃著王命論以感之而囂終不悟遂辟地河西河  
西大將軍竇融以為從事彪為畫策事漢融還京師  
召彪入見舉茂才拜徐令



杜林字伯山扶風茂陵人博洽多聞時稱通儒初為郡吏王莽敗盜賊起林與弟成及同郡范滂等俱客河西隗囂素聞林志節深相敬待以為持書平以疾辭去囂復強起遂稱篤囂乃出令曰杜伯山天子所不能臣諸侯所不能友今且從師友之位須道開通使順所志林終不屈節光武徵拜侍御史問以經書故舊及西州事賜車馬衣被羣寮知林以名德用甚尊憚之林於西州得漆書古文尚書一卷嘗寶愛

之雖遭艱困握持不離身出以示衛宏等於是古文遂行後為光祿勳大司空

任延字長孫南陽宛人年十二為諸生學于長安顯名太學學中號為任聖童值倉卒避兵之隴西隗囂已據四郡遣使請延延不應更始元年以延為大司馬屬拜會稽都尉時年十九時避亂江南者皆未還中土會稽頗稱多士延到皆聘請高行如董子儀嚴子陵等待以師友之禮掾吏貧者分祿給之賢士

大夫爭往宦焉建武初徵為九真太守九真吏人生  
為立祠

唐杜甫杜陵人字子美審言孫少貧不自振客吳越  
齊趙間李邕奇其材先往見之舉進士不中第困長  
安天寶十三載獻賦授右衛率府胄曹參軍祿山亂  
走鳳翔謁肅宗拜右拾遺出為華州司功參軍關輔  
饑棄官客秦州寓居東柯谷結草堂草堂之中有泉  
焉人稱為子美泉負薪拾橡栗自給其後往來栗亭

同谷間今栗亭同谷俱有草堂遺蹟後流落劔南節  
度使嚴武表為參謀檢校工部員外郎

明李天成莊浪人天啓甲子舉人隱居秦州仙人崖安  
貧樂志蕭然箕穎之風

朱新靖山西舉人闖賊逆變避跡秦州麥積山詩酒  
自適日逍遙于松泉間以終其身

直隸肅州

明岳正字季方順天灤縣人正統十三年進士及第

官修撰天順初以原官入閣言石亨曹吉祥權太重  
恐久不可制又言尚書陳汝言小人時命正視草歷  
數弊政亨吉祥構蜚語謂正賣直訕上謫欽州同知  
道潮以母老暫留汝言嗾校言狀逮繫詔獄杖百戍  
肅州亨吉祥誅起原官直經筵出為興化知府築隄  
溉田數千頃節縮浮費預備倉儲卿士大夫不利騰  
謗成化五年入覲致仕嘉靖中追贈太常寺卿諡文  
肅

劉大夏字時雍湖廣華容人天順八年進士除兵部  
郎宿弊盡革遷福建參政廣東布政移浙江皆以政  
績聞治河張秋疏上流築長隄水乃大治理宣府兵  
餉儲積充羨總制兩廣令行盜息民安召拜兵部尚  
書條上當興革十六事再陳兵政十害武宗嗣位乞  
歸加銜馳驛大夏忠誠懇篤忘身徇國見疾權倖劉  
瑾假田州岑猛事欲坐以激變李東陽力解乃戍肅  
州大夏徒步荷戈至大明門下叩首而去觀者塞路

歎息泣下父老攜筐進食所至罷市焚香祝其生還  
至戍所儒學生徒傳食之遇團操荷戈就伍五年赦  
歸八年瑾誅復官致仕教子孫力田謀食稍餘散之  
宗族預自為壙志卒年八十一贈太保諡忠宣所居  
東山草堂僅數楹天下稱東山先生

趙逐仙邑里名字未詳原任太常卿弘治初謫戍肅  
州陶諧有訪趙逐仙之作

潘 魴號愚叟原任刑部尚書以忤逆瑾謫戍肅州

陶諧號南川原任給事中以忤逆瑾謫戍肅州後起官為兵部侍郎總制兩廣

姜道淵原任蘭州知州不知何名道淵其字也正德間李高巡按河西時適涼州人徐謙任蘭州參將與姜相構李因劾徐謙徐乃逆瑾黨瑾力為內庇遂逮治李與邊備副使張天衢及道淵俱謫戍肅州

甘肅通志卷四十